

1077-2016: Bon complean Patrie dal Friûl!

Ai 3 di avrîl dal 1077, a Pavie, l'imperadôr Indri IV al decretave la nassite dal Stât Patriarcjâl furlan. Il Stât furlan al durà fintremai al 1420, cuant che al fo conquistât di Vignesie, e al rivà a formis di autoguvier une vore avanzadis pe epoche, tant che il Parlament furlan, une des primis assembleis legjislativis dal mont.

Pal so significât, il 3 di avrîl al rapresente duncje un moment impuartant pe comunitât furlane, une vere fieste par memoreâ e tornâ a pensâ in clâf moderne lis formis di rapresentativitât che, par tancj agns, a an caraterizât la Patrie dal Friûl.

La prime edizion de Fieste de Patrie, si è davuelte a Aquilee, tal 1977, nûfcentesim aniversari dal diplome di Indri IV. Ideadôr e grant protagonist de edizion di scree al è stât pre Francesc Placerean, che dopo i fo intitulât l'Istitut Ladin Furlan, l'ent che par agns al à coordinât i events celebratîfs.

Intai dîs de "Fieste" ta dut il teritori furlan, e ancje fûr dal Friûl, a vegnin fatis diversis manifestazions che si sierin intun unic event organizât ogni an intun comun diferent dal Friûl.

Il 2015 al è stât l'an che al à viodût ricognossude uficialmentri de bande de Regjon la Fieste de Patrie dal Friûl, in graciis de aprovazion de Leç n. 6 dai 27 di març: il so obietîf al è chel di ricuardâ e valorizâ lis origjins, la culture e la storie di autonomie dal popul furlan. In atuazion des normis previodudis de leç, chest an la Agenzie Regjonâl pe Lenghe Furlane e à sostignût la realizazion di manifestazions culturâls pe celebrazion de "Fieste" de bande di ents locâi in colaborazion cu lis Pro loco e altris sogjets publics e privâts cence fins di vuadagn o finalitâts mutualisticis.

La bandiere furlane: chê juste

La steme antighe de Patrie dal Friûl e je la acuile eraldiche di aur su cjamp celest. L'art. 2 de L.R. n. 6 dai 27 di març dal 2015 al dîs: "La bandiere de comunitât furlane e je formade di un drap di forme retangolâr cun al centri une acuile eraldiche di aur cun alis spleadis, cjâf a çampe, bec viert e sgrifis rossis, suntun cjamp celest.

Lis dimensions de steme a an di sei trê cuints de altece de bandiere che jê stesse e à di jessi alte doi tierçs de sô lungjece".

Il model plui innomenât e antic de bandiere patriarcjâl al è in mostre tal Domo di Udin: al fo cusît sul cjamesot di lin blanc che al faseve sù il cuarp dal patriarcje Beltram di Saint Geniès, restât su la catidre di Aquilee dal 1334 al 1350 e copât in maniere barbare di une conzure di nobii furlans.



La bandiere dal Friûl (1350). Une des plui antighis de Europe

Cheste bandiere antighe e je ancjemò in di di vuê la bandiere dal Friûl ricognossude in maniere universâl.

No va confondude cu la bandiere de istituzion dome amministrative clamade "Regjon Friûl-

Vignesie Julie", che e à une divignince tant plui resinte (1963) e dut un altri significât storic (su la bandiere regjonâl, la acuile e rapresente Rome che e va in socors di Aquilee, rapresentade de tor).

3 di Avrîl dal 2016: Gardiscja capitâl par une di

Chest an la celebrazion uficiâl de Fieste de Patrie si è tignude a Gardiscje, in provincie di Gurize.

Il program de zornade al è tacât cul incuintri li dal Teatri Comunâl Gnûf pe esposizion de bandiere dal Friûl e po dopo al è lâit indevant cu la sante messe in lenghe furlane celebrade dai trê Vicjaris dai Vesui furlans intal Domo dai Sants Pieri e Pauli e compagnade de corâl "Sacri Cantores Theresiani" direzude dal mestri Vanni

Feresin.

Daûr vie, si è tignude li dal Teatri Comunâl Gnûf la celebrazion civil, cu la leture de Bole costitutive dal Stât Patriarcjâl par cure de Compagnie Teatrâl di Sante Marie di Sclaunic, i intervents des autoritâts, la proiezion in anteprime dal video di dj Tubet (cun la regjie di Massimo Racozi) "No stâ a contâmi dome chê storie" e lis premiaziions dal concurs pes scuelis "Emozions furlanis in viaç pal teritori".